

Situacion CAFT den bista di FTA

Si no tin madurez den gobierno pa decision corecto otro mester hacie

ORANJESTAD - Pa sindicato FTA cu a haya invitacion pa sinta na mesa cu parlamento pa loke ta e ley di CAFT, e sindicato tin su punto di bista pa e tema aki. CAFT ta bon pa Aruba pa asina haya un control, pero di otro banda mester bay wak kico lo bay pasa pa e pueblo segun Hubert Dirksz.

“Personalmente mester lesa e ley, tambe a haya consejo di nos abogadonan y directiva, pero e ta keda na directiva completo pa tuma decision riba nan mes.

Personalmente mi ta bisa cu e ley no por ta otro, el a yega asina leu pa yega e dia cu e ta tuma luga y a wordo pasa, cual ta un base legal pa Hulanda haci locual cu a acorda pa nan haci. Si bay papia di e trabou cu CAFT lo haci ta bon cu e ta haci’e.” El a bisa cu semper tur hende ta haya cu e situacion financiero di pais Aruba ta malo y no a wordo atendi na un manera corecto pa baha gasto aumenta entrada y yega na un presupuesto balansa.

A cambio e gastonan a sigui, entradanan no a aumenta y aworaki no tin madurez di

gobierno ni parlamento pa tuma decisionnan corecto pues otro mester haci e trabou aki.

Gremio sinta na mesa cu gobierno

Nunca ta malo pa sinta na mesa cu gobierno, con cu bay bin democracia ta funciona e ora pasobra gremionan tin di bisa den loke ta sosode den e pais. E ta importante pa sinta cu gobierno, pero ta haya cu e sintamento aki cu gobierno mester ta continuo y na momento cu un gremio trece su punto padilanti uno responsabel, tambe cu ta prepara pa haci esaki, trece su punto padilanti, e mester wordo scucha di e gobierno.

“Gobierno a wordo informa y a wordo bisa hopi biaha di e maneho financiero cu ta malo. Por a wak diferente rapport di IMF y di otronan cu a bisa esaki y sinembargo e maneho a sigui malo. No tabatin ningun manera pa esaki wordo coregi. Sigur si tabata papia di un gremio mas fuerte, no lo a yega asina leu.”

Union sindical

A puntra Sr. Dirksz cu por



sinti cu no tin un union sindical awor aki ora tin algo pa e desaroyo di un pais Aruba pa cual e ta splica cu mester bay haci algo pa lanta cabes bek.

E union sindical ta debil sinembargo ta tratando pa fortifica esaki mantene democracia y sali na defensa di e clase trahado. Principal-

mente e parti social cu den un situacion financiero por wordo perhudica.

“Cu CAFT of sin CAFT ta un obligacion pa e sindicatonan uni. Esey ta responsabilidad di cada sindicato, principalmente e lidernan sindical, pa haci cu esaki bira realidad. A puntra Sr. Dirksz si e ta sinti cu locual tin poni den e ley lo bay afecta e pueblo di Aruba. El a bisa: “A lo largo un ley asina, si ta papia cu medidanan lo wordo tuma, pasobra ta papia di un presupuesto balansa y nos sa cu e situacion di pais Aruba, na nivel financiero ta basta dificil, e lo por resulta cu medidanan lo por afecta e clase trahado. Ta considera cu gobierno tin huiswerk pa haci hopi otro caminda y no necesariamente

mester bay directamente riba e clase trahado. Pasobra si ta di protesta contra e gobiernonan di Aruba, lo haci’e y si mester protesta contra gobierno di Hulanda tambe lo haci’e. Pues si mester bini un otro impuesto economia mester paga si bin un otro medida.

El a agrega cu mester ta cuidadoso pa no haci no solamente e poder di compra debil pero por haci tambe un Aruba hopi caro cu lo por tin efecto riba nos turismo. Ora nos economia sinti esey nos ta cay den un spiraal hopi dificil. “Mi ta spera cu e situacion cu nos tin cu ta un reto y e responsabilidad, cual mester wordo atendi na serio pa e politiconan y cu mas madurez,” el a termina bisando. □